

Wat Grootvader vertelt.

Vor langen Johren, et was gleif nah'n seibziger Kreige, wör in iusen lüttjen Dörpe Delfassen ne Friu krank. Sei harre seck woll up'm Hamelsbarge verküllt un kreeg slimme Weihdage¹. To Hiuse wörd sei in't Bedde epacket un ehre Luie schicke se nah'n Dokter in Eschershiusen, dä an'n annern Morgen eof kamm. Sei unnerföchte sei un schreew ehr dann wat up, wat sei innehmen schülle.

Dä lüttje Gufte un öhre öldere Swester Hannchen mohten mi dän Zettel nah Eschershiusen nah'r Afteiken gahn un dä Medizin halen. Dä sach ganz hell un klar iut un up dä Flaschen harre dä Afteiker 'n schönen rauhen Zettel ebacket. Dä Rinner wören niu ünnerwegens bannig neigerig, wo dei Medizin woll smecken däe. Sei harren fräucher mal wecke för 'en Hauten ekregen, un dä smecke jümmer sau schön säute². Sei maken dä Pulln up un wollen'r anlicken, un dorbi möhten sei seck woll annestoten hebben, denn klacks, lagg dä Flaschen an'r Aere. Sei was tau'n Glücke nich kaputt, aber dä schöne Medizin was iutelopen!

Junge, Junge, wat freigen sei et niu mit der Angest. Dä lüttje Gufte fung gleif an tau huilen, Hannchen was aber mit ehren drüttein Johren all helle un en richtiget Lork³. Sei dachte, et will woll nich scha'en un säe: „Niu huile man nich, Gufchen, wei gahnt nah Postmeiers Brunnen un püttchen'r Water rint, dat suiht ebenso iut un smecket eof nich slecht.“ Sei brochten se denn öhre Mudder hen un dä namm eof alle twee Stunden en Löppel vull davon in.

As an'n annern Morgen dä Dokter wä'erkamm un frög, wo et ehr günge, sä sei: „Och Herr Dokter, eck fähle meck all veel better, öhre Medizin hat bannig ehulpen, dä mötet Sei meck nochmal upschreiwten.“ Dä Dokter sä'e, dat hei seck dat woll edacht harre, dä Medizin harre hei sülmst erfunden, sei wöhre ja ein beten duier, awers helpen däe sei jümmer. Sei schreew ehr nochmal up, awer dä Friue wunnere seck en annern Dag doch, as sei en ganz annern Gesmack harre.

Sei würd balle we'er better, awer Gufte un Hannchen freigen nahstens jümmer en rauhen Kopp, wenn sei mit ehr Mudder an Postmeiers Brinke vorbigüngen.

Carl Käse.

¹ Weihdage (ostfälisches Platt) = Schmerzen

² säute = süß

³ Lork = Luder, freches Mädchen (eigentlich Lurch, Kröte)